

Na osnovu člana 8. Zakona o principima lokalne samouprave u FBiH („Službeni glasnik FBiH", broj: 49/06 i 51/09) i člana 21. stav 1. tačka 11. Statuta Općine Teočak (“Službeni bilten Općine Teočak", broj: 5/08 i 2/12), Općinsko vijeće Teočak, na sjednici održanoj dana 18.09.2020, donosi

ODLUKU

o načelima, kriterijima i postupku za određivanje naziva ulica, trgova, mostova i parkova na području općine Teočak

I UVODNE ODREDBE

Član 1.

Ovom Odlukom se utvrđuju načela, kriteriji i postupak određivanja i naziva ulica, trgova, mostova i parkova na području općine Teočak.

Član 2.

Ulicom, odnosno trgom u smislu ove Odluke, smatra se javna saobraćajna ili druga površina namijenjena za kretanje unutar građevinskog područja grada ili naselja (cesta, aleja, prilaz, magistrala, šetališta i slično).

Područje ulice, odnosno trga obuhvata javnu saobraćajnu površinu s pripadajućim katastarskim česticama.

Most obuhvata dio javne prometne površine koji je namijenjen za prelazak preko prirodnih i umjetnih prepreka.

Park je javna površina koja predstavlja dio općine ili naselja s održanim zelenilom.

Član 3.

Ulica i trg moraju imati naziv.

Most i park mogu imati naziv.

Na području općine Teočak ne mogu biti dvije ili više ulica, trgova, mostova ili parkova s istim nazivom.

Član 4.

Naziv ulice, trga, mosta ili parka se određuje po:

1. geografskim i drugim pojmovima (kao npr. toponimi),
2. datumima vezanim za značajne događaje iz historije Teočaka i Bosne i Hercegovine,
3. po imenima osoba koje su dale značajan doprinos u historiji Teočaka i Bosne i Hercegovine (kao npr. u periodu srednjovjekovne bosanske države, narodnooslobodilačke borbe 1941.- 1945. i odbrambeno-oslobodilačkog rata 1992.- 1995. godine i sl.),
4. imenima osoba koje su dale svoj doprinos u kulturnom, privrednom, društvenom, sportskom i naučnom razvoju Teočaka,
5. imenima lica ili drugim nazivima koji simboliziraju, u međunarodnim okvirima, doprinos razvoju čovječanstva, humanosti, nauke, kulture, mira ili druge oblasti o međunarodnog značaja,
6. Numeričkim rednim ili slovnim oznakama (npr. Prva ulica, ul. 8. mart i sl.).

Ulica, trg, most ili park ne može dobiti naziv po imenu žive osobe.

II KOMISIJA ZA ODREĐIVANJE NAZIVA ULICA I TRGOVA

Član 5.

Naziv ulice, parka, mosta ili trga određuje Općinsko vijeće na prijedlog Komisije za određivanje naziva ulica i trgova na području općine Teočak, uz prethodno pribavljanje mišljenje građana ili organa mjesne zajednice, na čijem se području ulica, park, most ili trg nalazi.

Komisija ima predsjednika i četiri člana, kojeg imenuje Općinski načelnik svojom odlukom na period od dvije godine.

Predsjednik i članovi Komisije se imenuju iz reda istaknutih stručnih, kulturnih i javnih ličnosti.

III REGISTAR NAZIVA

Član 6.

Za područje općine Teočak se vodi Registar naziva ulica, trgova, mostova i parkova (u daljem tekstu: Registar).

Registar je službena evidencija o nazivima ulica, trgova, mostova i parkova u upotrebi, koju vodi služba nadležna za komunalne poslove.

IV POSTUPAK I KRITERIJI ZA ODREĐIVANJE NAZIVA

Član 7.

Pisane inicijative za uvrštavanje naziva ulice, trga, mosta ili parka Komisiji mogu podnijeti:

1. Općinski načelnik,
2. vijećnici Općinskog vijeća,
3. mjesne zajednice,
4. grupa građana, ukoliko za svoju inicijativu prikupe najmanje 50 potpisa građana čije prebivalište je na području Općine

Član 8.

Uz pisane inicijative za uvrštavanje naziva ulice, trga, mosta ili parka, dostavlja se obrazloženje koje mora sadržavati osnovne podatke o predloženom nazivu, posebno one koji su opredjeljujući kod predlaganja naziva (historijskog datuma, toponima i slično).

Kada se inicijativa odnosi na ime neke osobe, ista mora sadržavati kratke biografske podatke i one podatke koji se odnose na doprinos navedene osobe razvoju Teočaka i Bosne i Hercegovine.

Inicijative iz prethodnog člana obavezno trebaju sadržavati tekstualni opis s osnovnim podacima o lokaciji, graničnim tačkama i izgledu ulice, trga, mosta ili parka, te po mogućnosti i grafički prikaz ulice, trga, mosta ili parka i razloge zbog kojih se predlaže taj naziv.

Član 9.

U razmatranju inicijativa iz člana 7. ove Odluke, Komisija će ocijeniti kvalitet predloženog naziva i njegovu sadržajnost.

Kvalitet predloženog naziva prilikom predlaganja imena osobe ogleđa se u njenom liku i djelu, te njegovog posrednog i neposrednog uticaja na prošlost, sadašnjost i budućnost građana Teočaka i Bosne i Hercegovine.

Sadržajnost prijedloga ogleđa se u uvažavanju zastupljenosti naziva iz razdoblja srednjovjekovne Bosne, prije i nakon navedenog perioda, perioda narodnooslobodilačke borbe 1941.-1945. i odbrambeno-oslobodilačkog rata 1992.-1995. godina rata i potrebe očuvanja bitnih vrijednosti i odrednica antifašističkog i humanističkog značaja, te afirmacije općih civilizacijskih vrijednosti i tekovina.

Član 10.

Na osnovu podataka iz člana 8. i 9. ove Odluke, Komisija utvrđuje prijedloge za određivanje naziva.

Prilikom utvrđivanja prijedloga iz prethodnog stava, Komisija će se rukovoditi sljedećim načelima:

1. uvažavanje izvornih rješenja, odnosno pravih imena ulica i trgova iz vremena kada su izgrađeni, kao i naziva koji su se odomaćili tokom historije i postali dio svijesti građana,
2. da se pri imenovanju nepotrebno više puta ne mijenja ime ulice odnosno trga,
3. uvažavanje potrebe grupisanja imena ulica i trgova radi kvalitetne orijentacije,
4. da se ulicama, trgovima, parkovima i mostovima po mogućnosti prvenstveno određuju nazivi po geografskim nazivima, toponimima, historijskim ličnostima i
5. da nazivi po mogućnosti budu što kraći i usaglašeni s odgovarajućim mogućnostima u programima za izdavanje identifikacionih dokumenata građana.

Član 11.

U pravilu će biti određivani nazivi ulica, trgova, mostova ili parkova po toponimskoj nomenklaturi, odnosno već zatečeni nazivi koji podsjećaju na nekadašnji morfološki izgled ulice, odnosno trga kojem se određuje naziv.

Član 12.

Komisija izrađuje spisak prijedloga za određivanju novih ili izmjenu postojećih naziva ulica, trgova, mostova, parkova na području općine Teočak s tekstom prednacrt odluke (u daljem tekstu: odluka) i dostavlja ga Općinskom načelniku uz prethodno pribavljeno mišljenje službe nadležne za prostorno uređenje u pogledu provodljivosti odluke s aspekta usklađenosti odluke s prostornoplanskom dokumentacijom.

Općinski načelnik, razmatra prednacrt Odluke iz prethodnog stava ovog člana i ukoliko istu ocijeni spremnom za razmatranje, prosljeđuje u dalju proceduru ka Općinskom vijeću. Općinsko vijeće utvrđuje nacrt Odluke i određuje javnu raspravu u trajanju od 30 dana. Tokom trajanja javne rasprave obavezno će se pribaviti mišljenje građana, odnosno građana naselja na čijem području se određuje novi ili mijenja postojeći naziv.

Ako se za naziv predlaže ime neke historijske ličnosti, od čije je smrti prošlo manje od 100 godina, pribavit će se saglasnost nasljednika prvog nasljednog reda.

Član 13.

Po zaključenju javne rasprave, Komisija sačinjava izvještaj o provedenoj javnoj raspravi, te utvrđuje prijedlog Odluke i isti dostavlja Općinskom načelniku radi davanja eventualnih

primjedbi i sugestija, a potom se prijedlog Odluke dostavlja Općinskom vijeću vijeću na razmatranje i usvajanje

V PRELAZNE I ZAVRŠNE ODREDBE

Član 14.

U skladu sa odredbama Odluke o nazivima ulica, trgova, mostova i parkova Općina će sačiniti Projekat označavanja ulica, trgova, mostova i parkova nazivima i zgrada kućnim brojevima, na osnovu koga će služba nadležna za komunalne poslove izvršiti postavljanje tabli sa naziva ulica, trgova, mostova i parkova i kućnim brojevima zgrada.

Projekat označavanja ulica, trgova, mostova i parkova nazivima i zgrada kućnim brojevima će prioritetno biti implementiran u centralnom dijelu općine Teočak.

Član 15.

Administrativno-tehničke poslove za potrebe rada Komisije obavlja sekretar.

Sekretara Komisije imenuje Općinski načelnik za period od dvije godine iz reda uposlenika općine Teočak.

Član 16.

Ova Odluka stupa na snagu danom donošenja, a bit će objavljena u „Službenom biltenu općine Teočak“.

PREDSJEDAVALJUĆI OPĆINSKOG VIJEĆA

Nusret Džuzdanović

Bosna i Hercegovina
Federacija Bosne i Hercegovine
Tuzlanski kanton
Općina Teočak
Općinsko vijeće
Broj:01-02-06-79-1/20
Teočak, 18.09.2020.godine

O B R A Z L O Ž E N J E

PRAVNI OSNOV ZA DONOŠENJE

Pravni osnov za donošenje ove Odluke su član 8. Zakona o principima lokalne samouprave u FBiH („Službeni glasnik FBiH", broj: 49/06 i 21/09) i član 21. stav 1. tačka 11. Statuta Općine Teočak (“Službeni bilten Općine Teočak", broj: 5/08 i 2/12).

RAZLOG ZA DONOŠENJE

Razlog za donošenje ove Odluke je potreba regulisanja postupka određivanja i obilježavanja naziva ulica, trgova, mostova i parkova.

OBRAZLOŽENJE POJEDINIH RJEŠENJA

Regulisanjem postupaka određivanja i obilježavanja naziva ulica, trgova, mostova i parkova na području općine Teočak dovest će se do efektivnijeg rada organa uprave i što kvalitetnijeg davanja odgovora na inicijative za davanje naziva pojedinih ulica, kao i pojednostaviti postupak obilježavanja nazivima ulica, trgova, mostova i parkova i zgrada kućnim brojevima, koje općina Teočak u narednom vremenskom periodu namjerava sprovesti.

PREDSJEDAVALJUĆI OPĆINSKOG VIJEĆA

Nusret Džuzdanović